

La Setmana n° 1097 - 2 au 15-03-2018

## LECTURA A L'ENTORN DE LA BÒRDA DE CANTEGUIT

**D**imunge 18 de heurèr de 6 ò dinc a 7 ò deu vèspe la *companhia* CKC d'Onèssa e La Haria qu'a presentat ua lectura a l'entorn de la Bòrda de Canteguit. Petita bòrda on se pòt véder e enténer, sustot, tot lo petit mairam e tots los animaús mèi grans de la parguia landesa, un ueu que's perd e que cau arretrobar, aquò entà har trabalhar l'imaginacion deus petits e deus mèi grans. D'aviada, un petit cant acompanhat per la guitarra, puish la lectura que comença.

Descripcion detalhada de la bòrda e dab ua votz plena d'estrambòrd lo Domenge Commet, que caqueja, que piula, que mugla, que shiula,... Los mèi petits que se'n arriden, plan segur. Que balha los noms gascons deus animaús e au còp l'arrevirada en francés entà que tota l'amassada e pusqui seguir lo devís shens chepic. Après 15 minutas, lo conte que s'acaba e Domenge Commet que comença de har participar lo son public, e'i es ua seishantenada de personas a l'escota. Un dròlle après l'aute, que'us hèi pujar sus l'empont dab eth e que'us demanda de balhar responsa a las soas questions :

Com hèi l'aso ? Com se ditz en francés ? Com se ditz en gascon lo nom d'aqueth animau ?

Tot aquò tostemps acompanhat deus grits que cadun coneish. Las responsas que shisclan :

Lo hasan ! Lo pòrc ! L'aso ! La pora... e en gascon se'vs platz ! Plan segur mercés a l'abertura a Magèsc, en seteme l'an passat, d'ua classa bilingua on 29 eslhèves de classa mairau e i son inscriuts e ací que son dens l'assemblada.

La transmission de la lenga que's persegueish en la Lanas e aqueth escambi que muisha l'enveja deus pairs e mairs de balhar futur a la lenga gascona. Òsca !

Podetz seguir Domenge Commet e los eveniments de la Cie CKC sus aqueth ligam : <http://www.lacieckc.fr/> — Los eveniments landés suu site de : <http://gasconlanas.e-monsite.com> e per Gasconha sancèra sus la pagina FB :

<https://www.facebook.com/perlogascon/>

Fòtos de l'eveniment d'arretrobar a la pagina 2 deu jornau.

**JJ DUBREUIL**

Animator deu cerc gascon de Mamisan  
Administrator de RPLBA - Secretari de Gascon  
Lanas